

BiH deset godina od potpisivanja Dejtonskog sporazuma

# Osloboditi se prisustva međunarodnih organizacija

BiH ne može pristupiti Evropskoj uniji sve dok joj pri stabilizaciji pomažu OHR i druge međunarodne institucije

Asocijacija Bosna i Hercegovina 2005. od 20. do 21. oktobra ove godine organizovaće konferenciju u Ženevi o temi *BiH deset godina nakon Dejtonskog sporazuma*.

Predsjedavajući Glavnog savjetodavnog odbora Asocijacije BiH 2005. **Wolfgang Petrič** je u četvrtak, na konferenciji za novinare, izjavio da ova i sljedeća godina predstavlja fazu kada BiH napušta dosadašnji dejtonski sistem i ulazi u fazu uređenja zemlje prema modelu kakav zahtijeva Evropska unija.

“Jasno je da BiH ne može pristupiti Evropskoj uniji dok postoje OHR i druge institucije i mehanizmi koji su pomagali ovoj zemlji da ponovo stane na svoje noge. Upravo taj korak, mogućnost da BiH stane na svoje noge, predstavlja ključ za ulazak BiH u EU”, izjavio je Petrič, izrazivši nadu da će konferencija u Ženevi doprinijeti emancipaciji BiH.

On, također, smatra da je BiH prepoznala potrebu za reformama, ali da u njihovom provođenju mora biti učinkovitija i efikasnija. Jedno od ključnih pitanja, smatra on, kojem bh. političari moraju posvetiti posebnu pažnju jeste da počnu raditi u službi građana.

“U posljednjih deset godina, tačnije od potpisivanja Dejtonskog mirovnog sporazuma, BiH više nije u fokusu međunarodnih finansijskih institucija. Konferencija u Ženevi je idealna prilika da ponovo pri-



Finci i Petrič: iz dejtonskog u evropski tip države

Foto: D. DORCHE

vućemo pažnju svijeta, da rezmiramo ono što je u posljednje vrijeme urađeno u našoj zemlji i da pokušamo donijeti model budućeg napretka Bosne i Hercegovine”, rekao je predsjednik Asocijacije BiH 2005. **Ja-**

**kob Finci.** On je ocijenio da je 2005. godina idealna za raspravu o sudbini Bosne i Hercegovine, jer nije opterećena predizbornim kalkulacijama i političkim pritiscima.

**S. ROŽAJAC**

## Ne postoji konsenzus oko ustavnih promjena

Jakob Finci ističe da će se Asocijacija BiH 2005. na ženevskoj konferenciji u oktobru dotaći i pitanja ustavnih promjena u BiH.

“Trenutno na sceni imamo preko deset raznih inicijativa za ustavne promjene u BiH. Međutim, evidentno je da u našoj zemlji ne postoji konsenzus oko rješavanja ovog problema, pa čak ni o rješavanju dvojnog državljanstva koje ide u prilog svim Bosancima i Hercegovcima”, ocijenio je Finci.